

san tan ni filanan — nimòrò 133  
 marisi kalo — san 1983  
**bp:24 - bamakò (mali)**  
 télèfòn: 22-21-04 CCP: 0155  
 dòròmè 5

kibarudilaw kuntigi: amadu ganyi-kantè

# kibaru

a bè bò kalo o kalo, faso ka kibarudiso ka yamaruya kònò

## mara kèlèli bè sen kan



mara ye bana min ye, dògòtòròw delila k'o jira, k'a sèbèn kibaru nimòrò 74 kònò, ko :

"mara ye ntumu dòw nò ye. a ntumu bù kuruw de kònò, kuru minnu bù maratòw la. o ntumu fana bù ntumu misèn caman wolo, minnu bù jènsèn farikolo wolo kòrò. olu de bù kè sababu ye, maratòw b'u nyènyè tuma bée. o ntumu misèn fana mana se mògò nyè ma, nyè bù tinyè, k'a daminè su rò fiyen na, ka a laban fiyer yèrè de ma.

fèn min bù o ntumu lase mògò ma sa, o ye dimògònin de ye, min bù maratò cin, ka ntumu kisè ta a joli kònò, ka taa mògò kènè cin, ka ntumu kisè lase o ma. o dimògònin bù sòrò ji woyotò de la, i n'a fò, kòjì ni baji la. o de y'a to, dugu minnu sigilen bù ba ni kòw da la, maratò ka ca olu de kònò."

mara kèrè sababu ye, fiyentò ka caya Mali yòrò dòw la, ani Afiriki jamana caman na. n'a dun ma kèlè, k'a ban pewu, dò de bù fara fiyentòw kan ka taa a fè.

mara ka kan ka kèlè cogo min, o kofòra dinyè ka kènèyakow nyènabò yòrò fè. a jirala k'a fò ko jamana kelen si tè se ka mara kèlè k'a ban n'a yèrè ka fèerèw dama ye.


### mara kèle jekulu

o de kosòn, mara kèle jekulu dò sigira sen kan, jamana wolonwula bù min na, n'olu ye Gana, ani Konowari, ni Otiwalita, ni Senegali, ni Ganbi, ni Ginebisawo, ani Mali. o jekulu ka nyògonye dò kèrè Bamakò desanburu kalo tèmènen.

o nyògonye sen fè, a jirala ko jekulu in y'a ka baara daminè kabini san 1974, k'a nyèsin kòrònyanfan yòrò ma, i n'a fò, Gana, Nizeri, Togo, Bènèn, Otiwalita, Konowari, ani Mali yòrò dòw (Banjagara).

san segin ninnu kònò, u ye baara sèbè kè, ka dimògòninw kèle cogo bù la : awiyòn bù ka wuli, k'i to san fè ka dimògònin faga fura seri badaw ni kòdaw la ; mobili bù ka boli-boli jamana fan bù, ka fura kù dimògòninw sigi yòròw la ; mògò bù taama i sen na, ka o fura lase kungo kònò yòrò bù la, dimògònin delila ka sòrò yòrò minnu na.

o nyògonye sen fè, an ka kènèyakow minisiri Ngolo Tarawele fana ye kuma ta. (a tò bù nyè 2 la)



dimògòninw fagali daminèna yòrò minnu na : Gana, Nizeri, Togo, Bènèn, Konowari, Mali kòrònyanfan, Otiwalita.  
 a ma daminè yòrò minnu na : Mali tilebin, Senegali, Seraleyòn, Ginebisawo.

# mara kèlèli bè sen kan

minisiri Ngolo Tarawele ka kuma

a y'a jira k'a fò ko baaraba min kèra, o nò yera ka ban : yòrò caman bè yen, i n'a fò badafèlaw ni kòdafèlaw, o yòròw dugukolo ka nyi kosèbè, sènèfèn bè bè sabati yen fo ka mògò wasa. nka, mògò tun mana sigi yen ka sènè kè, dimògònин ninnu bè i cin, ka mara bila i la, fo k'i n'i denw kè fiyentò ye. o kèra sababu ye, mògò ye yen bila, ka o yòròw lankolon to.

an dun bè bi min na, dimògònин dògòyara yen kosèbè. mògò bè se ka taa sigi o badaw n'o kòdaw la, ka san caman kè sènè la, bana t'i minè tugun.

◦◦◦

nka, o baara nyèlen n'a ta o ta, Ngolo Tarawele y'a jira fana ko halì bi, ko dòw bè yen, minnu bè se ka baara nyuman kèlen tinyè.

- a fòlò ye dimògònин kura nali ye yòrò furakèlenw na. a kòlsira ko dimògònин ninnu tè to yòrò kelen na : dòw yèrè bè bò u sigi yòrò fòlò la, ka taa kilomètèrè 400 nyògòn kè ka sigi yòrò kura nyini. n'an y'an miiri o la, an n'a dòn ko dimògònин fagali mana dan yòrò kelen kelen ma, o baara tinyè ka di. bawo, dimògònин dò wèrèw bè se ka bò yòrò furakèbaluw la, ka wuli ka na sigi yòrò furakèlenw na, ka bugun, ka mògò cin, ka mara jènsèn yen ko kura.

o miiriya kònò, minisiri y'a nyini jèkulu fè, mara kèlèli daminèna yòrò fòlò minnu na, o baara kana dan o

yòròw ma. n'an t'a fè mara kèlèli in ka kè sègèn gansan ye, dimògònин ka kan ka silatunun yòrò bè. o kama, kabini sisan, dimògònин faga baara ka kan ka daminè tilebinyanfanfèla fana la, i n'a fò, Mali, Senegali, Sealeyòn, ani Ginebisawo, fo ka taa se kògòji da ma.

n'o tè, ka dimògònин to o jamana yòrò dama dòw la, mògò si tè se k'a fò ko i kisira mara ma pewu, ko dimògònин tèna se tugun k'i cin, ka bana in bila i la.

- a filan ye min ye, fura min bè kè ka dimògònин faga, a kòlsira k'a fò ko dimògònин suguya dòw bè yen, o fura tè se k'u faga. o fana ye fèn ye, min bè se ka baara kèlen tinyè.

o kosòn, minisiri ko nyinini ka kan ka kè, ka fura dò wèrè sòrò, min bèna se ka dimògònин suguya bè faga, k'a bèe ban.

## bèn kèra min kan

kuma caman fòra nyògònye in na. dòw y'a jira ko baara kèta ka ca, o musakaw ka bon, ko wari min bè jèkulu bolo mara kèlèli kama, o wari tèna se ka o baara bè kè k'a ban.

o kosòn, jèkulu mògòw ko sanni baara kura ka daminè, baara min bè sen kan kabini san 1974, o de ka kan ka dafa fòlò. nka, kabini sisan, cèsirili ka kan ka kè ka wari nyini, walasa tilebinyanfan baara min kofòra minisiri Ngolo Tarawele fè, o fana ka se ka daminè joona.

min ye fura ko ye, bèn kèra a kan, k'a fò ko nyinini sèbè ka kan ka kè, walasa fura do wèrè ka sòrò joona, min ka fisà ni kòròlen ye.

## mara kèlèli Mali kònò

mara kèlèli bè sen kan Mali kònò Banjagara lamini na.

kabini san 1977, dògòkun o dògòkun, sannakurun dò tun bè bò Bojulaso ka na fura seri dimògònин sigi yòròw la Banjagara lamini na.

kabini san 1981, a fòra ko sannakurun nali musaka ka ca, ko mògò bè se ka fura seri k'i to dugu ma, o de kèra san 1981 ni san 1982 kònò. a dun kòlsira k'a dòn k'a fò ko o san fila baara nyèna kosèbè, o musakaw ma caya, k'a d'a kan, dugu kelen kelen mògòw yèrè y'u sen don baara la : mògò 110 sugandira Banjagara lamini duguw la, ka kè dugu dògòtòròw ye. k'u to u ka dugu kònò, u bè mògòw furakè, u bè dimògònин kèlè fana.



dimògònин bè sòrò ji balan yòròw la Banjagara lamini na

# nyininkaliw jaabi

nyininkali dò bòra kibaru nímòrò 73 kònò, ko :  
 kamalen fila jèra terimuso kelen na.  
 kamalen kelen bè, su o su, a bè dòròmè miliyòn saba  
 di muso in ma.  
 kamalen dò, a ye dòròmè fila di muso ma su fòlò la. o  
 dugujè, a ye dòròmè naani di. o fana dugujè, ka dòròmè  
 segin di, ka taa a fè o cogo la : a mana min di su min  
 na, o dugujè, a bè o nyògòn fila di.  
 u ma o dabila, fo ka kalo kelen dafa. jòn ka dilen  
 cayara ni jòn ta ye ?

Biji Kulubali  
 Wolojèdo

## jaabi :

dòròmè miliyòn saba ka o ni dòròmè fila ye cogo min  
 na, ni mògò y'i miiri o la, a caman b'a fò ko hali ni  
 jateminè ma kè, i b'a dòn ko kamalen fòlò in ka dilen  
 bè caya kosèbè ni filanan ta ye.

nka, ni mògò min ye ko in kòròbò, k'i timinandiya k'a  
 jate minè fo k'a ban, i bè taa a sòrò, kamalen filanan ta  
 de bè caya ni fòlò ta ye : jateminè b'a jira ko kamalen  
 fòlò ka dilen bèe lajèlen kalo kònò, o nyògòn mugan ni  
 saba de bè bò kamalen filanan ka dilen na, fo k'a tò to  
 miliyòn caman yèrè ye.

## o jateminè filè :

kamalen fòlò ta bèe lajèlen :  $3000\,000 \times 30 = 90\,000\,000$

## kamalen filanan ta, su o su :

1.	2	11.	2048	21.	2 097152
2.	4	12.	4096	22.	4194304
3.	8	13.	8192	23.	8388608
4.	16	14.	16384	24.	16777216
5.	32	15.	32768	25.	33554432
6.	64	16.	65536	26.	67108864
7.	128	17.	131072	27.	134217728
8.	256	18.	262144	28.	268435456
9.	512	19.	524288	29.	536870912
10.	<u>1024</u>	20.	<u>1048576</u>	30.	<u>1073741824</u>

tile 1

fo 10 : 2046

tile 11

fo 20 : 2095104

tile 21

fo 30 : 2145386496

kamalen filanan ta bèe lajèlen :

$2046 + 2095104 + 2145386496 = 2147483646$

kamalen filanan ta ka ca ni fòlò ta ye sinyè joli ?

$2147483646 : 90000000 = 23$

(a tò ye 77483646 ye)

•

• •

nyininkali dò wèrè bòra o nímòrò kelen kònò, ko :  
 n'a fòra, i ka mure saba fa kè mure kelen kònò, u dun  
 bè bonya a kelen ye.

o mure kelen kelen ka kan ka fa mun na, janko tò fila  
 fa bè yèlèma kelen falen kònò, n'a tè bòn ?

## jaabi :

i bè mure kelen fa kògò la, ka kelen fa ji la, ka saba-  
 nan fa cèncèn na. i bè mure fa kògò dòonin dòonin kè  
 mure fa ji la. a bè o bèe yeelen. i bè laban k'o mure fa  
 ji ta, k'o kè mure fa cèncèn in na dòonin dòonin.

o tuma na, u saba fa kèra kelen kònò.

Mama Tarawele  
 Ginyan

•  
 • •

nyininkali dò bòra kibaru nímòrò 95 kònò, ko :  
 kònò dò yaalatò bélè kònò, ji lògò b'a la. a ye buteli  
 dò turulen ye dugu rò, ji b'a kònò. a ye a da don, a ma  
 se ka ji nin sòrò. a dun tè se ka buteli nin bò dugu rò, a  
 tè se ka a kari fana.

o tuma, a ka kan ka mun kè ka ji in sòrò k'a min ?

## jaabi :

kònò nin bè bélè misèn caman tòmò a da la, ka kelen  
 kelen bila buteli kònò. n'o kèra, ji bè hakè min na, a  
 bè yèlèn ka bò yen. n'o kèra, a da b'a sòrò, a b'a min.

Jabe Sisoko  
 Jèn

•  
 • •

dò fana bòra kibaru nímòrò 87 kònò, ko :

kònòw tèmèntò, n ye n kan to :

- "kònòw mugan, aw ni sògòma."

kònòw ko :

- "an tè mugan bò. nka, n'i ye nin nyògòn fara an kan,  
 k'a nyògòn tilancè fara an kan, an bè mugan bò."

o kònòw tun ye joli ye ?

Saganti Sisòkò  
 Genubantan

## jaabi :

kònòw ye segin ye. bawo, segin tilancè ye naani ye.  
 n'i dun ye segin fara segin kan, ka naani fana fara a  
 kan, o bè kè mugan ye.

# kankodònnyi

Danyè suguya ye saba ye bamanankan na : danyèdiliw, danyèbønnaw, ani danyè dorokolenw.

kulu fòlò : danyèdiliw

Kulu fòlò, olu ye danyèdiliw ye. U n'u kòrò bè nyògòn na, mògò tè se ka fèn bò u la, n'o tè u ka danyèya bè ban. N'u tigètigèra fana, kòrò si tè tigètigèda ninnu na.

Danyèdili dòw filè : mògò, kelen, boli, kuturu, don, jan, belebele, ta, da, fin.

kulu filanan : danyèbønnaw

Kulu filanan, o ye danyèbønnaw ye. Olu bòra danyèdiliw de la : kumaden dòw de bè fara danyèdiliw kan, k'u kè danyèbønnaw ye.

O kumadenw, kòrò b'u la. Nka, u tè se ka fò u danma. Wajibi, u ni danyèdiliw de bè fò nyògòn fè, u bè sèbèn ka nòrò olu la fana. O de kosòn, a bè fò u ma : "nòrònnaw".

Nòrònnna dòw fòlò bè sèbèn ka sòrò ka danyèdili sèbèn : olu ye nyènòròw ye. Ci kelen bè u ju kòrò danyèbønnna misali ninnu na : laboli, madon.

Nòrònnna dòw bè sèbèn danyèdili kò fè, ka tila k'o danyèdili kelen sèbèn ka tugu a la. O ye cènòrò ye, i n'a fò misali ninnu na : janmanjan, cémancé.

Nòrònnna dòw fana bè yen, olu sigi yòrò ye danyèdili kòfèla ye. A bè fò u ma kònòròw. A dòw kòròcilen bè misali ninnu na : mògòya, bolilen, bolitò, belebeleba, tali, dama, finman, dantan, bolibali, keleñnin, bolibaga.

Kòlòsi : 1. kònòrò fila bè se ka sòrò bønnna kelen na, i n'a fò : nògòntanya.

2. caya taamaseere fana ye kònòrò ye : misiw, belebelew.

kulu sabanan : danyèdorokolenw

Danyè kulu sabanan, o ye danyèdorokolenw ye. Danyèdorokolen bè se ka dila ni danyèdili gansanw ye, wa-

lima ni danyèdili ni danyèbønnaw ye :

- danyèdili gansanw. Misali : jiribulu, farikolonyènajè, balikukalan, nyèmògòso.
- danyèdili ni danyèbønnaw. Misali : lamòkojuguya.

nyininkali

A' ye ci kè nòrònnaw ju kòrò kumasen ninnu kònò :

n'i y'a mèn cèbakòrò nyamantan, ne ko don.  
n'i y'a mèn cèbakòrò kòròbòbali, ne ko don.  
cèkòròbaw ni musokòròbaw jigi ye ne de ye.  
e, n badenw, a' ye sabali, a'ka n lamèn dòonin.

(a jaabi bè bò kibaru nata kònò)

nyininkali kòròlen jaabiw

Nyininkali minnu kèra kibaru nimòrò 132 kònò, olu jaabi filè nin ye :

1. 'banan' bè daminè ni 'ba' ye, ka 'n' tugu a la. 'bali' bè daminè ni 'ba' ye, ka 'l' tugu a la. 'bara', 'bari' ni 'barò' bè bù daminè ni 'ba' ye, ka 'r' tugu a la.

O la sa, an bè sigini lajè, ka 'n' ni 'l' ni 'r' yòròw nyini : n'i y'a daminè ni 'a' ye, i bè taa 'l' de sòrò fòlò, ka tèmè kà taa 'n' sòrò, ka tèmè kà taa 'r' sòrò. O cogo kelen na, 'bali' de fòlò bè sèbèn danyègafe kònò, ka sòrò ka 'banan' sèbèn, ka sòrò ka 'bara', 'bari' ni 'barò' fana sèbèn, i n'a fò :

bali      banan      bara      bari      baro

2. 'daaba', 'dabi', 'daba', 'daamè', bè bù daminè ni 'da' ye. 'a' tugura 'da' la danyè minnu na, olu de fòlò bè sèbèn, k'a d'a kan, 'a' de fòlò sèbènne bè sigini na.


'daaba' fòlò de bè sèbèn, ka sòrò ka 'daamè' sèbèn ; bawo, 'b' min tugulen bè 'daa' la, o de fòlò sèbènne bè sigini na.

'daba' fana bè sèbèn, ka sòrò ka 'dabi' sèbèn, k'a d'a kan, 'a' de fòlò sèbènne bè sigini na.

O la sa, o bèe lajèlen bè sigi nyògòn kò cogo min na danyègafe kònò, o filè :

daaba      daamè      daba      dabi

Bakari Jara  
Balikukalan nyèmògòso  
Bamakò



## nyògòn laadi kuma

nin kèra dugu dò la / a tògò ye  
"fayèrèla". ntura saba tun bè dugu  
in kònò. / fòlò tun ye jèman ye, filan-  
nan tun ye finman ye, / sabanan tun  
bilennen don. ntura saba in tun bè  
to ka taa kungo kònò, / u ni kungo  
kamiw bè baro kè nèrè sun dò kòrò.

dòn dòn, / k'u to baro la, / waraba  
y'u mankan mèn, / o fana nana, / kami  
bèe wulila k'u sigi nèrè san fè / ntur-  
raw bonya kojugu, / hali waraba tun  
tè se ka fila kèle, / waraba jòlen y'i  
miiri ka fèerè sòrò, / a y'i kanto :  
- "e ye ne není."  
ntura bilenman y'a nyininka.  
- "ne wa ?"  
waraba ko : - "ayi."  
finman ko : - "ne wa ?"

waraba ko : - "ayi."  
jèman ko : - "ne wa ?"  
waraba ko : - "unhun."  
ntura tò fila ko :  
- "a'y'o nyènabò aw ni nyògòn cè."  
ntura jèman ni waraba kèle / a  
kelen ma se / waraba y'o kan kari,  
k'o su sama, / ka taa so.  
tile saba o kò fè, / a nana ntura tò  
fila ni kamiw sòrò baro la, / a ko :  
- "e ye n není."  
kami bèe wulila k'u sigi san fè  
tugun, / ntura bilenman ko :  
- "ne wa ?"  
a ko : - "ayi."  
finman ko : - "ne wa ?"  
a ko : - "unhun."  
bilenman ko :  
- "a'y'o nyènabò aw ni nyògòn cè."


waraba y'o kan kari, ka taa n'o  
ye.

tile saba, / a nana tuguni, / a ko :  
- "ntura bilenman, bi ta da bè e la.  
i ma n neni, / i ma fosi kè n na, / i b'i  
labèn, / n b'i kan kari, / n'a y'a sòrò,  
aw saba tun jèra kan kelen kan, / ne  
tun tè se aw la."

waraba y'o kan kari, ka taa n'o  
ye.

kabini o kèra kamiw nyè na / u  
fana jèra k'u kan kè kelen ye, / o  
kosòn, / hali ni dononkòrò binna ka-  
mi kelen kan k'o kèle, / tòw bèe la-  
jèlen bè na dononkòrò bugò.

Yakuba Sidibe  
Zanbilala



Yakuba Sidibe yèrè de  
ye nyègèn in dila



# Bakari Jan

i tè sigi dè."

a ko a bè a bolo ni bere jigin,  
Sinbalan ko : - "faama, o fana ye nkalon ye dè,  
i bolo fila körötalen bè cogo min,  
a ni bere tè jigin tugun dè ;  
wa a tè bin ne fa kan fana.  
è, mògòtigi, è, mògò min fa bè janfa  
k'o kun ci Segu yan,  
o ye ne Sinbalan ye ?"

ð, mògòtigi sonsorolén tora dalan kan,  
a bolo ni bere körötalen ;  
wòsi y'a ta,  
kabi a tulo ju körò sa,  
ka jigin fo kulusi daforo kan.  
Sinbalan ye ka dafila turu faama sonsorolen disi rò,  
a sigilen bè yèrèyèrè,  
a bè yèrèyèrè.

◦  
◦ ◦

ð, Bakari Jan ye mògò ye, a hinè ka bon.  
a ye faama filè.  
- "èe," a ko :  
"nka, faama, e ye kabakomògò ye.  
faama, ne m'a dòn,  
ne ye baara min kè e ye Segu yan,  
n tun m'a dòn,  
i bè sòn ka ne wele ko i bè n janfa ka n faga.  
ni ne t'a fò Sinbalan k'i to yen,  
Sinbalan bè mugu ci i la k'i faga.  
a mana dìya,  
Segu tò ka jè ka ne ni Sinbalan faga sa,  
Sinbalan kòni b'e faga.  
nka, n den Sinbalan, n bè i deli, faama to n ye,  
kana a faga."  
a ko : - "baba, n'i ko n k'a to yen.."  
a ko : "faama, e yèrè y'a dòn,  
mògò min fa bè janfa k'o faga Segu yan,  
o ye ne Sinbalan ye ?  
ð, nka, nin tè baasi ye,  
baba, n'i ko ne ka faama to yen,  
n b'a to yen.  
nka, a yèrè ka wuli ka bila an nyè,  
a ye wulu minnu da an nyè sira la,  
wulu kana wowo an na dè.  
ni wulu kelen wowora, n bè mugu ci faama na dè."

- "ayi", mògòtigi ko : "fo ka taa,  
fo i sera i fa ka bulonda la,  
wulu kelen tè se ka kuma.  
ne yèrè de ye wuluw bila aw nyè sira la."

◦  
◦ ◦

o yòrò la sa,  
Bakari Jan ye i kanto a denkè Sinbalan ma,  
a ko : - "n den Sinbalan,  
ne b'e fo bi sa, n den,  
nka, n ma kuma saba f'i ye.  
foli ka di mògò bée ye, fo mògò saba,  
o mògò saba tè foli fè.  
n'o tè, i ni wula,  
i ni su,  
i ni sògòma,  
i ni tile,  
a ka di mògò bée ye fo mògò saba :  
ð, sonyèlikèla tè foli fè,  
ð, sunguruntigèla tè foli fè,  
ð, bokèla tè foli fè.  
ð, nka, n den Sinbalan, e sen tè nin mògò saba la.  
nka sa, n den, i ni ce, nin diyara n ye.  
è, faama, wuli ka bila an nyè,  
i ka an tèmè i ka wuluw la."

◦  
◦ ◦

ð, Daa wulila ka bila Bakari Jan nyè,  
Daa ka baramuso Kònninba, o bilara Bakari Jan nyè,  
Bakari Jan dara Kònninba kan,  
ð, Daa dara Bakari kan,  
Sinbalan ni dafila dara Daa nò fè  
ka dafila turu a kò rò,  
halì a tè se k'a kòfilè.

u sera bulon fòlò kònò,  
tònjònw ko u bè to ka wuli,  
Daa ko :  
- "a' ye aw fara ;  
a' ye tèmè k'aw da,  
fòlen ma bò."

(a tò bè bò kibaru nata kònò)

# kibaru kanubagaw

ka bò

## Bugaribaya

an ye liburu dò sòrò, n'o ye kii-mèli liburu ye. n y'a kalan, n taara a sòrò yòrò dò la, u ye Turamagan ni Jolofin faama ka kèle nyèfò.

u y'a jira ko Turamagan ye Jolofin faama faga. n'ka, Jolofin faama denkè ye Turamagan to sunògò la, k'a fana faga.

o la, ni baro sera mògò o mògò mòkè ma, i b'a nyini i k'a nyè jòn-jòn dòn. ne Laji dun ye Turamagan mòden dò ye yan. ne b'a nyini aw fè, aw min bè Turamagan ka konyè dòn kosèbè, aw ka a nyè jòn-jòn lase an ma, an minnu ye Turamagan bònsòn ye, an ka faamuyali sòrò an mòkè ka konyè la.

Laji Danbèlè

que tu  
saches  
existant  
la vente

jaabi :

a delila k'a fò ko kibaru bè kè sababu ye, kibaru kalanbagaw ka nyògòn sòn hakili la.

Laji Danbèlè ka bataki in nalen, Gabukòrò Keyita fana ye sèbèn ci an ma, n'o sèbèn bè Turamagan kofò k'a pereperelatigè. Gabukòrò yèrè ko : "ne b'a fè ka Turamagan ka maana bò Mali kònò. ne ka hami ye an faso ka taa nyè, mògò ka nyèbò Mali fè, nka Mali kana nyèbò mògò fè. o tè se ka kè ni Malidenw yèrè ma Mali ko kòròw labò kènè kan."

o kosòn, an bè maana in bò kibaru kònò, a bèna Laji Danbèlè ka nyininkali fana jaabi. nyègèn minnu b'a la, Gabukòrò yèrè de y'olu dìla.

Gabukòrò Keyita dun kofò kun tè balikuka landenw ye. ale de ye liburu dò sèbèn ko "Sunjata Keyita ka maana", n'o liburu bòra kabini san 1977.

## Turamagan Tarawele ka maana



Jolofin masa yèrè jòlen filè nin ye a ka jamana kònò

Sumangurun Kante ka fanga ti-nyènen, fanga wèrè min ni Sunjata n'o kèlela, o ye Jolofin masakè ye. Sunjata Keyita ni Jolofin masa fòra nyògòn kò dancè ko la. Sunjata ko a ka sabali. a ko :


- "ne tè sabali. n mago tè aw Mandenkaw la." a ko : "ne bèna Manden ci tile fila in na."

o la, Sunjata ko Silamaganba Koyita ye :

- "Silamagan, e k'i ji ja ka taa a fò Jolofin masakè ye ko ne ko a ka sabali, ko kèle man nyi an ni nyògòn cè. i labèn, ka taa o fò a ye, ka na."

Silamaganba Koyita y'i labèn. a taatò ko :

- "ne taara Jolofin."
- "wa, i na Jolofinkaw fo."
- "u n'a mèn."



Silamaganba Koyita labènnen filè nin ye ka taa Jolofin jamana kan

# kuma yòrō

- "Jolofinkaw, aw ni sògòma." mògò ma kuma. Silamaganba ko :
- "è, a' tè kuma fè wa ?" a ko Jolofin masakè ma :
- "ni i ye ne bòlen ye Manden ka na yan, mògò de ye ne ci Jolofin masakè ye. Sunjata ko ne ka na a fò i ye ko i ka sabali, ko kèle man nyi a' ni nyògòn cè."

Jolofin masakè ye Sunjata ka ci-den gèn. a ko :


- "bò n kun na, bilakoro, wo, ne bè Mandenka jate dò wèrè ye wulu sogo dunna kò wa ? taa a fò Sunjata ye ko ne ko : n tè Mandenka jate dò wèrè ye wulu sogo dunna kò."

Silamaganba ko :

- "o tè baasi ye, ne taara Manden."


nin ye  
Jolofin  
masakè ye

nin ye  
Silamagan ye



nin ye  
Turamagan  
Tarawele ye

nin ye  
Silamaganba Koyita ye



Turamagan ni Silamagan  
bè ka nyògòn fo

Silamaganba kòseginnna, ka taa Manden. Jolofin masakè ye dusukasi kuma min fò a ye, a y'i miiri o la, fo a bè ka kosi sira fè ka taa Manden.

Turamagan Tarawele fun ye Sunjata ka kèleçè farin ye. Silamagan bè don Manden da fè tuma min, Turamagan bè bò o da kelen fè. a y'i to ka Silamagan kositò ye.

a ko :

- "e, Silamagan, a kèra di ?"

Silamagan ko :

- "ne taara Sunjata ka ci kan fò Jolofin masa ye."

Turamagan Tarawele ko :

- "Jolofinkaw ka kénè ? kòri tòorò tè yen ?"

a ko :

- "tòorò bè yen, bari, Jolofin masa ma ne bèn ni hèrè ye. a ko ale tè Mandenka dòn dò wèrè ye wulu sogo dunna kò."

# kibaru kanubagaw

## Turamagan Taraweles

Turamagan ko :

- "nin tè baasi ye. nka, n b'a fè ka taa a nyèfò Sunjata Keyita ye. nin kòròfò in tè se ka to tan cogo si la, fo ne Turamagan Taraweles ka taa Jolofin masa minè Jolofin, k'a faga, k'a bonbonsi tigè, ka na a' dì Jata ma Manden. n'o ma kè, n kaikubò, ni Sunjata ma sòn kèle wulili ma, ka taa Jolofin masakè kama, ne bè n yèrè faga. bari, Jolofin masakè ye kuma min fò anw ye, fo ne Turamagan nyè ni Jolofin masa nyè ka kè kelen ye Jolofin jamana kònò, a k'a dòn ko cèw tè kelen ye."

o  
o o

Turamagan y'i labèn, ka taa a fò Sunjata ye a ka so kònò. Turamagan ko :


- "Sunjata, i ka ciden nana. nka, a ye kuma min fò ne nyè na, ne ma se ka sigi yòrònin kelen."

Sunjata ko :

- "a ko dì, Turamagan ?"

Turamagan ko :

- "Silamagan nalen ye kuma min fò, o filè nin ye, Sunjata Keyita. Silamagan ko ale taalen Jolofin masa ka jamana kònò, a ko : n y'a fò a ye ko : Jolofin masa, Jata ko n ka na a fò i ye ko i ka sabali, ko kèle man nyi a' ni nyògòn cè. masakè y'a gèn. a ko : bilakoro, a ko ale tè Mandenka dòn dò wèrè ye wulu sogo dunna kò. a ko a b'a fè ka na Manden minèn ta tile fila in na. a kònì ye Silamagan dògòya kosèbè, fo a kasira, ka na don Manden dugu kònò. a bè don Manden kònò, ne' fana bè bò. ne y'a nyininka, a y'a nyèfò n ye. ne ko n bè na a fò i



ye, an ka kèle wuli ka Jolofin masakè faga, ka na ni a bonbonsi ye."

o kèle, Sunjata ko :  
- "an k'a to yen, a' tè ko dòn."

o  
o o

Turamagan Taraweles dimina, ka taa so kònò. a sinna k'a ka falo ta, ka taa a ka soforo la, ka yòrò nyuman nyini, k'o senyi daminè, ko o ye ale kaburu ye.

o  
o o

# kuma yòrò ka maana

o kèlen, u ye mògò bila, ka taa a fò Jata ye ko :  
 - "Jata, Turamagan b'a la k'a kaburu sen, ko sini Mandenkaw b'ale su don. ko bari, Jolofin masa ye kuma min fò Silamaganba Koyita ye, n'ale ma taa Jolofin masakè minè, k'a faga, k'a bonbonsi tigè, ka na n'a ye Manden kònò, a tè bèn."

a nyèfòlen Jata ye, a ko :  
 - "è, è, taa a fò Turamagan ye ko n ye kèlè dògòda kari nata. n ye ton ani jama labila Turamagan ye, a ni kèlèdenw bée ka taa Jolofin jamana kan."

? confirmé ?

u taara. o nyèfòlen Turamagan ye, o diyara a ye. a ye falò bila, ka taa so kònò.

kari sera sa, Turamagan Tarawele ye ton ani kala minè

Jata fè, an'u ka kèlèdenw. u ye Jolofin jamana sira minè.

◦ ◦

Turamagan Tarawele n'a ka jamakulu sera Jolofin jamana kan. kèlèdenw tora dugu so kò fè. Turamagan yèrè taara Jolofin masakè nyininka, a ye kuma min fò Jata ka ciden ye, a ka segin o kan. Turamagan ye Jolofin masa nyininka ko :


- "Jata ka ciden min nana i fè yan," a ko : "i ye mun de manamana kuma fò a ye, ko a ka taa a fò Jata ye Manden ?"

a ko :

- "ne Jolofin masa ko n mago tè Mandenka la. ne tè Mandenkaw dòn dò wèrè ye wulu sogo dunna kò."

(a tò bè bò kibaru nata kònò)

Turamagan n'a ka kèlèdenw filè Jolofin sira kan.



kèlèdenw bè kò fè

Turamagan bè nyè fè

# Afiriki tònba ka gèlèyaw

an bée y'a mèn arajo la ko gèlèyaba ye Afiriki tònba sòrò san 1982 la.

Afiriki jamana bée nyèmògòw ka nyògònye min tun ka kan ka kè Ti-ripoli, Libi jamana na, uti kalo la,

o ma se ka kè, k'a d'a kan, dòw tun b'a fè Saharawi jamana ka ye o nyògònye in na, dòw tun ma sòn o ma.

nyògònye dò wèrè tun kofòra, ko o bè kè nowanburu kalo la, o fa-

na ma se ka kè, k'a sababu kè bén-baliya ye Cadi jamana kuntigiya ko la.


## Mali ka miiriya

Mali ka miiriya ye min ye o ko filà in na, Peresidan Musa Tàrawele y'o jira k'a pereperelatigè zanwuye kalo tilé 19.

a ko Saharawi jamana ko ka kan ka nyènabò Saharawi jamana mògòw yèrè de fè, u yèrè de k'a fò, u b'a fè u ka jamana ka kè cogo min na. o la sa, bée ka kan k'i ji ja, wote ka kè o jamana na, walasa jamana-denw sago ka dòn ka jèya.

a ko Mali jamana delilen bè, a ni jamana tòw ka kumanyògònya. nka, k'a fò ko "kaarisà de ka kan ka kè o jamana kuntigi ye", o tè Mali ka fòta ye, o kuma bennèn don jamana-denw yèrè de da. o la, ni fanga bè mògò min bolo jamana kònò, n'o tigi de bè ka jamana mara, Mali b'a jateminè ko o de bè jamana kun na, ko an n'o de bè se ka kuma ka o jamana ni Mali cè kow nyènabò.

an nyè na, o miiriya ninnu de bè se ka Afiriki tònba dèmè, ka nògòya dòn a ka baara la. a kèra cogo o cogo, an kòni b'gn cèsiri tuma bée, k'an seko bée kè, Afiriki tònba in ka sabati, nyògònfamuya, bèn, ani nyògòndèmè ka don Afiriki jamana bée ni nyògòn cè.



Afiriki jamanaw sigicogo